



## curriculum vitae

### **Victoria Berther-Cavegn**

3-5-1925 - 31-8-2011

*Carstgauns che vivan ord la speranza  
vesan pli lunsch.*

*Carstgauns che vivan ord la carezia  
vesan pli profund.*

*Carstgauns che vivan ord la cardientscha  
vesan tut en in'autra glisch.*

L. Zanetti

Nossa mumma Victoria Berther-Cavegn ei naschida ils 3 da matg 1925 a Dardin. Ensemen cun ses dus frars Placi e Theofil ha ella passentau ina legreivla affonza sil bein puril da lur geniturs a Danis. Suenter la scola populara a Danis eis ella stada alla scola da dunnas a Cuera ed ei turnada sco scolasta da laver anavos en sia vischerna nativa. Sco ei descha da lezs onns, fuva ella sco scolasta intretschada fetg ellas uniuns dil vitg. Cun plascher ed engaschi ha ella instruiu duront biabein 20 onns.

Igl onn 1963 ei Victoria maridada cun Venanzi Berther da Sedrun ed els ein secasai en Tujetsch. Ensemen han els fundau e menau ver 30 onns la stizun digl USEGO. Dil temps ch'ils lags da fermada vegnevan ba-ghegai susteneva ella cun plaid e fatg ils luvrers jasters. Las bunas en-conuschientschas da lungatgs jasters han simplificau e dau contacts cun turists da tuttas naziuns sur onns ora. Survetscheivla ed aviarta sco ella era vegneva ella appreziada da sia clientella da lunsch e da maneivel.

Sper la truscha en stizun han ils geniturs adina giu grond plascher e quita da lur affons Miriam e Cuno che eran lur luschezia. Gia igl onn 1990 ei Victoria vegnida vieua. Bia memia baul ha ella piars siu partenari ed ils affons lur bab. La finala ha ella dau si dus onns pli tard la stizun e dedicau dapli temps alla famiglia -surtut gudiu ses beadis, che eran siu sulegl.

Tut ils onns en Tujetsch ha ella teniu ferms contacts cun siu vitg nativ Danis e siu frar Placi. Ella mava bugen "engiu". Leu cultivava ella cun plascher siu iert, gudeva puma e fluras ed ils inscunters culs vischins da pli baul.

Cun sia moda e maniera directa e nuncumplicada haveva ella in bien fil tier giuven e vegl. Aschia vegneva ella dad organisar viadis a Danis, a Glion e Trun e sch'ei fageva basegns tochen ella Bassa. En aulta veglia-detgna gudeva ella aunc da semover era persula en marcaus sco Cuera e Turitg. Star sin agens peis ed esser autonoma eran impurtontas valurs per Victoria.

Quei ha era simplificau ad ella avon treis onns il pass en casa s.Vigeli. Leu sesenteva nossa mumma bein protegida e tuttina astgava ella mantener sias libertads. Aschia fageva ella meinsvart visetas ni in pèr dis vacanzas tiels ses. La casa s. Vigeli ha capiu da dar a nossa mumma aunc sils onns in niev dacasa. Ella appreziava ils survetschs e la buna tgira dil persunal sco era ils contacts cordials cun cussadentas e cussadents. Las visetas da parents ed enconuschents fagevan grond plascher e purtavan variaziun el mintgadi. Sin damonda rispundeva ella adina: "Jeu hai bien ed ei fan bien cun moi". Era en num da Victoria in cordial Dieus paghi a tuttas e tuts ils collavuraturrs dalla casa s. Vigeli ed a lur cussadentas e cussadents, che han possibilitau ad ella ina biala e digna sera dalla veta.

Quei ambient cun sia atmosfera famigliara ha lu era gidau Victoria igl onn vargau a supportar la greva frida dalla mort prematura da siu carezau beadi Martin, cul qual ella veva in ligiom aparti e che steva perquei ad ella zun a cor. Ils davos meins han sias forzas denton schau suenter pli e pli ed il desideri da suandar Martin ei carschius. Tonaton ha nossa mumma mai piars siu bien humor e sia tenuta adina positiva.

Bein provedida ed el ravugl dils ses ei siu rudi da veta seserraus la notg dils 31 d'uost 2011 ed ella ha astgau render si'olma al Scaffider.

Nossas visetas meinan nus ussa sin santeri e las regurdientschas fan mal e dattan confiert enina. Cara mumma, ruaussa en pasch.